



GABINETE DO PRIMEIRO MINISTRO

Diskursu Sua Exelénsia Primeiru-Ministru, Taur Matan Ruak, iha okaziaun Debate Parlamentár kona-ba Renovasaun Deklarasaun Estadu Emerjénsia da-12

Parlamentu Nasionál, Dili, loron 31 fulan-marsu tinan 2021
Tuku 09:00

Sua Exelénsia,

Senhor Prezidente Parlamentu Nasionál,

Sua Exelénsia sira,

Vise-Prezidente sira, Sekretária no Vise-Sekretáriu sira Parlamentu Nasionál nian;

Sua Exelénsia sira,

Senhora no Senhor Deputadu sira husi Bankada Polítika nian hotu-hotu;

Exelénsia, Karu Kolega sira

Membru sira Governu Konstitusionál VIII

Senhora no Senhor sira;

Povu Timor-Leste;

Distintu konvidadu sira!

Hafoin tinan atus ida tolu pandemia gripe espanhola nian ne'ebé halo mundu tomak nakdoko, ne'ebé hamate ema millaun 50 liu iha Sékulu XX, umanidade hasoru fila-fali virus ida ne'ebé halo ema mate barak liután maka SARS-CoV-2, responsavel ba moras COVID-19, ne'ebé mak antes ne'e seidauk akontese, ne'ebé laiha tratamentu barak disponivel, virus ne'e hamate ona ema millaun rua, rihun atus ualu liu iha mundu tomak.

Kalamidade ne'e belar ona iha mundu tomak, afeta ona ba ema barak, la iha destinsaun ba ema se de'it, liuliu, rasa, seksu, língua ka relijiaun, la'ós afeta de'it ba relasaun pesoál, família no

relasaun sosiál nian sira, maibé mós fô impaktu boot ba nivel atividade ekonómika, kulturál no relijioza nasaun nian.

Ne'e la'ós buat normál iha Estadu Direitu Demokrátiku ida atu assiste ba aprovasun no ba renovasaun Estadu Emerjénsia ba períodu da-11, ne'ebé mak tutuir-malu de'it, ho medida restrisaun ba direitu no liberdade fundamentál nian sira ne'ebé justifika bazeia ba sirkuntánsia sira ne'ebé la prevee husi kalamidade públika no emerjénsia nasional.

Felizmente, ita la la'o mesak iha luta ida ne'e ne'ebé mobiliza sosiedade, nasaun no mundu tomak. Ita kontinua konta ho apoiu tékniku, sientífiku, operasionál no finanseiru husi parseiru dezenvolvimentu públiku no privadu, nasional no internasionál oin-oin, ne'ebé apoiu tebes ona ita iha esforsu koletivu ne'e.

Ho ajuda husi parseiru oin-oin sira, iha possibilidade atu foti medida sira ba prevensaun no ba kombaté pandemia ne'e to'o oras ne'e iha território nasional ho rezultadu di'ak ne'ebé hatudu la laiha ema ne'ebé maka mate, maske la hatán ba ita-nia populasaun ninia espetativa tomak.

Kada nasaun hasoru ona ninia dezafiu rasik no iha kazu Timor-Leste nian, bazeia ba meu sira, rekursus no infraestruturas ne'ebé disponivel iha nasaun ne'e, ita fô ona prioridade no atensaun espesial ba kontrolu fronteira sira, tanba ne'e orijen prinsipál husi kazu sira ne'ebé infetadu.

Durante besik fulan sanulu ita halo vijilánsia, monitorizasaun, prevensaun no mitigasaun ba kazu importadu sira, ita susesu ona iha ita-nia misaun difisil ida-ne'e.

Maibé, hahú husi fulan-dezemburu tinan 2020, situasaun ne'e muda ho lalais tebtebes, ho rejistu aumentu no kontinua hasoru infesaun foun sira ne'ebé maka'as, justifika ona aprovasaun ba medida rigoroza no ejizente sira durante vijénsia Estadu Emerjénsia ba dala ikus nian.

Infelizmente, la posivel atu evita ba situasaun ne'ebé aat tebtebes ne'e, hahú lokaliza iha Postu Fronteirisu Fatumean nian, maibé hada'et ba beibeik ba zona sira seluk país nian, ho destake ba situasaun grave liu ne'ebé daudaun ne'e ita hasoru iha Munisípiu Díli, iha ne'ebé rejista foku ativu 52 (limanulu-resin rua) husi transmisaun lokal.

Maske ita hatán kedas ho medida sira ne'ebé foti ba konjuntura foun no modelada sira ba situasaun iha terrenu, iha ne'ebé justifika ona impozisaun husi diferente serka sanitária sira iha Munisípiu Bobonaru, Kovalima no Díli, maibé la posivel atu evita alastrumentu ne'e, iha ne'ebé ninia movimentu sira repete iha Munisípiu Baucau no Vikeke, daudaun ne'e amesa transforma transmisaun lokal ba transmisaun komunitária.

Medida sira ne'ebé estabelese ba prevensaun no mitigasaun COVID-19 nian estabelese tiha ona husi comunidade internasionál, maka hanesan, restrisaun ba viajen sira no ba konfinamentu nian sei implementa mós husi ita hodi hamenus propagasaun ba COVID-19, hodi fô tempu ba vasina ne'ebé mak administra ona iha país sira seluk bele to'o lalais mai Timor-Leste, hodi fô imunizasaun ba populasaun Timoroan tomak.

Senhor Presidente Parlamentu Nasional,

Ilustre Deputada no Deputadu sira,

Vasina sira la hanesan ne'ebé disponivel kontra COVID-19 dezenvolve ona iha tempu *badak tebes*, daudaun ne'e hanesan esperansa foun ida ba nasaun sira hotu ne'ebé enfrenta hamutuk kalamidade ida-ne'e.

Maibé, hanesan instrumentu importante ida atu kombaté virus, vasina sujeita ba prokura ida maka'as tebes iha merkadu internasionál sira, ne'ebé koloka husi presau asentuada ba entidade produtora sira no ninia país esportadór sira.

Ita asiste hela preokupasaun ba kompetisaun internasionál ne'ebé mosu iha negósiu boot kona-ba vasina sira, ne'ebé ninia efeitu ameasa atu tau iha planu daruak ba nasaun sira ne'ebé menus dezenvolvida hanesan Timor-Leste, nune'e fó prejuízu ba nasaun boot no dezenvolvida sira.

Maske hasoru dezafiu sira ne'ebé iha no iha asesu ba vasina sira, ita iha benefísiu husi apoiu Sistema COVAX nian, ne'ebé kria liuhusi protesaun Nasoens Unidas no administra husi Organizaun Mundiál Saúde nian, serbisu hamutuk ho UNICEF, ne'ebé atu benefisia tomak nasaun membru 92, inklui Timor-Leste.

Liuhusi sitema globál ida-ne'e, garante katak iha tempu badak vasina sira sei to'o iha ita-nia nasaun. Maibé, seidak iha data fiksi ne'ebé atribui.

Governu kontinua dezenvolve esforsu sira iha kontaktu ho entidade internasionál oinoin, ne'ebé ho objetivu atu garante asesesu iha prazu adekuaudu ba vasina hirak-ne'e, tuir ita-nia kompromisu atu proteje populaun tomak to'o tinan ne'e remata.

To'o vasina sira ne'e to'o mai, sai nu'udar responsabilidade ita hotu nian atu kontribui hodi evita katak timoroan ida labele mate tanba vírus ida-ne'e.

Hahalok ita ida-idak nian maka sei garante salvaguarda ita-nia moris rasik no sei salva ema seluk nia moris. Ita-nia família sira-nia moris, liuliu, feto sira, la'en sira, oan sira, inan-aman no avó sira, nune'e mós ita-nia viziñu no kolega sira, iha ita-nia liman.

Ita hotu tenke hanoin no fó hanoin ba ita-nia kompatriota sira, kona-ba esforsu no hahalok responsável ne'ebé ita adota iha tinan kotuk, atu ita bele rekupera prátika di'ak no komportamentu sira ne'ebé evita ona hodi redús mate no propagasaun husi moras ne'e durante tinan 2020 nia laran iha Timor-Leste.

Iha tinan kotuk, Timor-Leste hetan rekonhesimentu husi comunidade internasionál hanesan país ualu ne'ebé hetan susesu-di'ak iha jestaun COVID-19 nian, hanesan ho Nova Zelândia no país sira seluk.

Maibé, rezultadu di'ak sira-ne'e agora iha hela prova husi vaga moras foun ida-ne'e nian, ne'ebé agresiva no ezijente liu.

Atu ita bele fila-fali ba ita-nia moris normál sein rejistu mate sira nian, ha'u apela ba hotu-hotu, sein exesaun, katak ita kumpri medida sira prevensaun nian ne'ebé hala'o hela, atu nune'e, kontribui, hodi evita propagasaun husi moras ida-ne'e iha ita-nia país.

Ha'u tenik fali, dala ida tan, katak Governu ne'e kontinua halo buta hotu ne'ebé mak nia bele halo, tantu iha nível nasionál no nível internasionál, ho Parseiru Bilateral, Rejionál no Multilateral sira, atubele asegura akompanhamentu saúde timoroan hotu-hotu nian.

Iha asuntu ida-ne'e, ha'u hakarak apela ba Vosa Exelénsia, Ilustre Deputada no Deputadu sira, atubele renova konfiansa no apoiu ne'ebé hatudu ba Governu iha fulan hirak ikus ne'e, hodi autoriza ba renovasaun estadu emerjénsia ba da-12 husi Deklarasaun Estadu Emerjénsia, nu'udar instrumentu fundamentál no insubstituível ne'ebé permite ba ita atu previne no kombate moras ida-ne'e ne'ebé iha poténsia boot ba mate.

Ikusliu, ha'u mós husu ba ita-nia sidadaun hotu-hotu iha ne'ebé de'it, ne'ebé maka hela iha territóriu nasionál no iha rai-li'ur, nune'e mós ba autoridade no organizaun sira sociedade sivil nian:

Ita hamutuk luta hasoru moras ida-ne'e!

Obrigadu barak.

Maromak haraik Bensaun ba ita hotu!